

आकाशवाणी

संसद च भुगतान च देरी गी दूर करने ते विवाद समाधान गी सखल्ला बनाने लेई लौहके, भलेयां लौहके ते दरम्याने दर्जे दे उद्यमें दे विकास संशोधन विधेयक गी पारित करी दिता गेआ।

2. प्रधानमंत्री नरेंद्र मोदी होरें एन.डी.ए च शामिल होए दे नमें सांसदें कन्नै मलाटी कीती। संसद कार्रवाई बार-बार होआरदी रुकावटं उप्पर चैंता प्रगट कीती।

3. भारत ते चीन नै असल नियंत्रण उप्पर स्थिति दी समीक्षा कीती, दवें पा बन्ने कन्नै लगदे क्षेत्रें च अमन-शांति कायम रखने उप्पर सहमत होए।

4. राष्ट्रपति द्रौपदी मुर्मू होरें राष्ट्रपति होरें राष्ट्रपति मुर्मू होरें राष्ट्रपति भवन च राष्ट्री हत्थखंडी पुरस्कार 2025 प्रदान कीते।

5. उत्तर भारत दे केई हिस्सें च भारी बरखा होई।

6. शतरंज च ग्रैंड मास्टर आर. प्रज्ञानंद होरें संयुक्त राज्य अमरीका च सेंटुइस रैपिड ते ब्लिट्ज खताब जितेआ।

7. ते रक्षिता रामराज ते अश्विनी चाहिला होरें आसन च कोरिया मास्टर्स बैडमिंटन टूर्नामेंट च महिला इक्कले मुकाबले दे सेमीफाइनल च अपनी थाहर पक्की कीती।

<><><><><><>

India-Pakistan Relation

बदेश मंत्री सुब्रह्मण्यम जयशंकर होरें आखेआ ऐ जे भारत ते पाकिस्तान दे सरबंध उसलै गै अगगे बधी सकदे न जिसलै आतंकवाद, दुश्मनी ते हिंसा शा मुक्त म्हौल होऐ। लोकसभा च लिखियै दिते गेदे इक परते च डाकअर जयशंकर होरें आखेआ जे पाकिस्तान अजे बी बन्ने पार आतंकवाद गी बढ़ावा देने ते आतंकवाद आतंकवाद गी भारत खलाफ इस्तेमाल करने दी नीति पर कायम ऐ। उन्नै दस्सेआ जे पुलवामा आतंकी हमले दे बाद भारत नै पाकिस्तान थमां सबनें शा मते अनुकूल राष्ट्र दा दर्जा वापस लेई लैता हा ते पाकिस्तान कन्नै आयात निर्यात आली सबनें चीजें पर सीमा शुल्क बधाइये 200 फीसद करी दिता हा। बदेश मंत्री होरें आखेआ जे पुलवामा आतंकी हमले दे बाद

भारत नै केई कूटनीतिक गैहीं बी पुट्टियां न। इंदे च सिंधु जल संधि गी स्थगित रखना, अटारी सीमा चौकी गी बंद करना, वीजा सरबन्धी बंदिशां लाना ते दौनें मुख्य दे उच्चायोगें च राजनयिक ते अधिकारिक कर्मचारिणें दी गिनतरी घट्ट करना शामिल ऐ।

<><><><><><><><>

Parliament

संसद नै लौहके, भलेयां लौहके ते दरम्याने दर्जे दे उद्यम विकास संशोधन विधेयक 2026 अज्ज लोकसभा च पारित करी दिता। राज्य च एह बिल सोमवार पास करी दिता गेआ हा। इस बिल दा उद्देश्य लौहके, भलेयां लौहके ते दरम्याने उद्यम क्षेत्र दे भुगतान च होने आहली देरी गी दूर करना ते विवाद निपटान प्रक्रिया गी सरल बनाना ऐ। विधेयक मूजब सबनें केंद्री सार्वजनिक क्षेत्र दे उपक्रमें गी एम.एस.एम.ई शा खरीदे गेदे समेयान ते सेवाएं दे सबनें बिलें दे भुगतान ट्रेड रिसीवेवल डिसआउंटिंग सिस्टम दे माध्यमें राएं करना होग जेकर कुसा विवाद च मध्यस्थता नाकामयाब हुंदी ऐ तां इसी खत्म होने दी तरीक शा 30 दिनें दे अंदर मामले गी पैची पाने आहली बवस्था तैहत हल कीता जाहग। एहदे अलावा पक्षें दी दलीलां पूरी होने दे 90 दनें दे अंदर मध्यस्थता दा फैसला देना लाजमी होग। बिल च एह बी प्रावधान ऐ जे जेकर कोई मामला 6 महीनें शा मते समें तगर लटकेआ रौहंदा ऐ तां सप्लायर गी दिते गेदे फैसले दी राशि दा घट्ट शा घट्ट 50 फीसद भुगतान कीता जाहग। विधेयक पारित होने मगरा पीठासीन अधिकारी दलीप सैकिया होरें सदन दी कार्रवाई चलाने दा यत्न कीता ते प्रदर्शन करारदे सदस्यें गी सदन गी सुचारू ंगगै कन्नै चलन देने दी अपील कीती। उनें नराजगी जतांदे होई आखेआ जे इस तरीके दे बरोध लोकतांत्रिक बवस्था दे अनुरूप नेई ऐ। उनें आखेआ जे सदन दी गरिमा बनाई रखना सबनें सदस्यं दी जिम्मेदारी ऐ। संसदीय मंत्री किरेन रिजिजू होरें विपक्ष दे रवैये उप्पर चैंता जतांदे होई आखेआ जे गृह मंत्री अमित शाह होरें संसद सत्र दरान ोज सदन च औंदे न ते राती चिरें तगर संसद च मौजूद रौहंदे न। लगातार हंगामा जारी रौहने करी पीठासीन अधिकारी होरें लोकसभा दी कार्रवाई दिन भरें लेई स्थगित करी दिती। हून सदन दी अगली बैठक सोमवार बड्डलै 11 बजे होग। एहदे शा पैहले बड्डलै सदन दी कार्रवाई शुरू होने पर लोकसभा अध्यक्ष ओम बिरला होरें भारत छोड़ो आंदोलन दे स्वतंत्रता सेनानियें ते शहीदें गी श्रद्धांजलि अर्पित कीती।

<><><><><><><><>

Seth

केंद्री मंत्री संजय सेठ होरें आखेआ ऐ जे लम्में समें शा चा' रदे छात्र आंदोलन दे बावजूद झारखंड सरकार नै विद्यार्थियों दी चैंताएं दे हल लेई लोड़चदी गेंह पुट्टी ऐ। संसद परिसर च मीडियाकर्मियें कन्नै गल्लबात दरान उन्नै आखेआ जे छात्र आंदोलन दे दो हफ्तें शा मते समें तगर जारी राहने दे बाद गै राहुल गांधी होरें वीडियो स्नेह दे राएं इस मुद्दे पर प्रतिक्रिया दिती। इस दरान बीजेपी सांसद निशीकांत दुबे होरें झारखंड लोक सेवा आयोग ते झारखंड कर्मचारी चयन आयोग दिएं भर्तियें च कथित अनियमितताएं दी पारदर्शी जांच दी मंग कीती।

<><><><><><>

RS

राज्यसभा दी कार्रवाई नीट मुद्दे पर विद्यार्थियों दे प्रदर्शन दरान कथित पुलस कार्रवाइ सने बक्ख-बक्ख मुद्दें पर विपक्ष दे हंगामे दे चलदे अज्ज दिन भरै लेई स्थगित करी दिती गई। सदन दी अगली बैठक हून सोमवारें बड़लै 8 बजे होग। पैहले स्थगन मगरा दपैहरी 12 बजे सदन दी कार्रवाई शुरू होने उपपर सभापति सी.पी राधाकृष्णन होरें विपक्ष दे हंगामे बश्कार सोआलै आहला समां शुरू करोआया। केंद्री रेलवे मंत्री अश्विनी वैष्णव होरें रेलवे च कवच ते सिग्नलिंग प्रणाली दी स्थापना कन्नै जुड़े दे इक सोआला दा परता देना शुरू कीता पर हंगामे कारण अपना जवाब पूरा नैई करी सके। एहदे करी सभापति होरें सदन दी कार्रवाई गी पूरे दिन लेई स्थगित करी दिता। एहदे शापैहले बड़लै सदन दी कार्रवाई शुरू होने उपपर सभापति सी.पी राधाकृष्णन होरें आखेआ जे 9 अगस्त महात्मा गांधी हुंदे दूरदर्शी नेतृत्व च शुरू होए दे भारत छोड़ो आंदोलन दी 84मीं बरेगंड ऐ। उन्नै स्वतंत्रता संग्राम दे शहीदें गी श्रद्धांजलि अर्पित कीती। उन्नै आखेआ जे भारत छोड़ो आंदोलन देश दे स्वतंत्रता संग्राम दा इक ऐतिहासिक पड़ाव ऐ जिनें देशभक्ति, एकता ते राष्ट्रसेवा दे आदर्श कन्नै पीढ़ियें गी प्रेरित कीता ऐ।

<><><><><><>

Prez. Handloom Awards

राष्ट्रपति द्रौपदी मुर्मू होरें अज्ज नमीं दिल्ली च राष्ट्रपति भवन च बरे 2025 लेई संत कबीर हैंडलूम पुरस्कार ते राष्ट्री हथखंडी पुरस्कार प्रदान कीते। कुल 22 पुरस्कार जिंदे च 3 संत कबीर, हथखंडी पुरस्कार ते 19 राष्ट्री पुरस्कार शामिल न। हथखंडी बुनकरें

गी उंदे कौशल, रचनात्मकता ते भारत दी परम्परा गी जींदा रखने दे जत्न लेई दिते गे। इस मौके पर 4 विशेष डाक टिकटां बी जारी कीतियां गेइयां। 12में राश्ट्री हत्थखड्डी दिवस दे मौके पर आयोजित इक कार्यक्रम च बोलदे होई राश्ट्रपति होरें आखेआ जे हत्थखड्डी क्षेत्र नां शड़ा केई लोकें लेई आजीविका दा साधन ऐ, सगुआं समावेशी विकास लेई महत्वपूर्ण ऐ।

<><><><><><>

Badminton

बैडमिंटन च भारी खडारी Rakshita Ramraj ते Ashmita Chaliha नै अज्ज आसन च कोरिया मास्टर्स दे महिला एकल दे सेमीफाइनल च अपनी थाहर पक्की करी लैती ऐ। Rakshita नै क्वार्टर फाइनल च भारती खडारी तन्वी शर्मा गी हराया ते हून सेमीफाइनल च ओह इक होर भारती खडारी Ashmita कन्नै खेडडन। शीर्ष वरीयता प्राप्त जपान दी हीना अकेची गी हराइयै अशिमिता सेमीफाइनल च पुज्जी गेइयां।

<><><><><><>

Chess

भारती ग्रैंडमास्टर R Praggnanandhaa होरें अमरीका च आयोजित Grand chess Tour St. Louis rapid and Butz दा खिताब जिती लैता ऐ। 20एं बरें इस खडारी नै अखीरले दौर शा पैहले आले राउंड च उजबेकिस्तान दे ग्रैंडमास्टर Jovokhir Sindarov कन्नै ड्रा खेडदे होई एह खिताब अपने नां कीता।

<><><><><><>

PM-Article

प्रधानमंत्री नरेंद्र मोदी होरें अज्ज हत्थखड्डी सरबन्धी राश्ट्री ध्याड़े दे मौके पर इक अखबार च केंद्री कपड़ा मंत्री गिरीराज सिंह हुं'दे लेख गी सांझा कीता। सोशल मीडिया दी इक पोस्ट च प्रधानमंत्री होरें आखेआ जे गिरीराज सिंह होरें अपने लेख च हत्थखड्डी गी भारत दी सबनें शा बड्डी सभ्यता सरबन्धी ताकतें चा इक करार दित्ता ऐ ते देसै दी समृद्ध ते बन सबन्नी इलाकाई कपड़ा सरबन्धी परम्पराएं गी उजागर कीता ऐ। कपड़न मंत्री होरें भारत दे नौजवानें गी अपील कीती जे ओह हत्थखड्डी सैक्टर दे भविष्य गी

आकार देने ते बुनकरें दी आजीविका गी बढ़ावा देने लेई विरासत गी तकनीक कन्नै ते रचनात्मकता गी कारोबारी समझा कन्नै जोड़न।

<><><><><><><>

Rains

देश दे उत्तर पच्छमी इलाकें च तेज बरखा दर्ज कीती गई। मौसम विभाग नै अज्ज दिल्ली च भारी बरखा दा येलो अलर्ट जारी कीते दा ऐ। मौसम विभाग नै जम्मू-कश्मीर, लद्दाख, गिलगित, मुजफ्फराबाद, हिमाचल प्रदेश ते उत्तराखंड लेई इस म्हीने दी 12 तरीक तगर तेज बरखा पौने दी पेशनगोई कीती ऐ। तोआई, ओडिशा तटीय कर्नाटक, पूर्वी मध्य प्रदेश, पूर्वी राजस्थान, केरलम, माहे ते पूर्वोत्तर भारत दे किश इलाकें च अज्ज तेज बरखा पौने दी मेद ऐ। ओडिशा च परतियै बरखा पौने करी राज्य दे केई इलाकें य हाइ औने दा डर लोकें गी डरा'रदा ऐ। स्हाड़े संवाददाता नै दस्सेआ जे तेज बरखा पौने करी राज्य सरकार ते आपदा प्रबंधन एजेंसियां इक बारी परतियै सक्रिय होई गेइयां न।

<><><><><><><>

PM-New

प्रधानमंत्री नरेंद्र मोदी होरें अज्ज अपने आवास च राश्ट्री जनतांत्रिक गठबंधन-एनडीए च हाल च शामिल होए दे बक्ख-बक्ख सांसदें कन्नै मलाटी कीती। इन्दे च एन.सी.पी.आई ते शिवसेना दे सांसद बी शामिल न। बैठक मगरा संसद परिसर च पत्रकारें कन्नै गल्ल करदे होई शिवसेना सांसद ज्योति सावित्री नागनाथ वाघमारे होरें आखेआ जे प्रधानमंत्री होरें संसद दी कार्रवाई च बार-बार होआ'रदी रूकावटें उप्पर चैंता बुज्झी। उनें आखेआ जे प्रधानमंत्री हुंदा मनना ऐ जे लगातार हंगामे करी नमें चुनोए दे प्रतिभाशाली सांसदें गी सदन च अपने बचार रक्खने दा मौका नेई मिली पांदा।

<><><><><><><>

INDO-China

भारत ते चीन नै दिल्ली च आयोजित भारत चीन सीमा मामले उप्पर परामर्श ते समन्वय दे कार्य तंत्र दी 36मीं बैठक च असल नियंत्रण रेखा दी स्थिति दी समीक्षा कीती ते एहदे उप्पर चर्चा कीती। विदेश मंत्रालय दे इक बयान च आखेआ गेआ ऐ जे दवें पक्षें बश्कार सीमा निर्धारण, सीमा प्रबंधन, संस्थगत तंत्र गी मजबूत करने ते बन्ने

पार सहयोग कन्नै जुड़े दे मुद्देँ उप्पर तफसीली बचार-विमर्श होआ। दवेँ पक्षेँ इस गल्ला पर बल दिता जे बन्ने कन्नै लगदे क्षेत्रेँ च शांति ते स्थिरता बनाई रखन। दपक्खी सरबंथेँ दे विकास लेई अत लाजमी ऐ। भारत प्रतिनिधिमंडल दा नेतृत्व विदेश मंत्रालय च पूर्वी एशिया मामले दे संयुक्त सचिव सुजीत घोश होरें कीता, जदके चीन दे प्रतिनिधिमंडल दा नेतृत्व चीन दे विदेश मामलेँ दे विभाग दी महानिदेशक हऊ यानची होरें कीता। बैठक दरान दवेँ पक्ष इस गल्ला पर सहमति होए जे असल कब्जा रेखा उप्पर बकाया मुद्देँ दा हल ते कुसा चाल्ली दी गलतफहमी ते गलत आंकलन शां बचने लेई मौजूदा राजनयिक ते सैन्य संवाद तंत्र दा उपयोग जारी रखेआ जाहग।

<><><><><><>

LG-Handloom Day

उपराज्यपाल मनोज सिन्हा होरें जम्मू-कश्मीर ते देसै दे बुनकरें ते शिल्पकारें गी हत्थखड्डी सरबन्धी राश्ट्री ध्याड़े दे मौके पर ममारकबाद दिंदे होई भारत दी समृद्ध सगोसार संस्कृति ते रिवायती दस्तकारी गी जींदा रखने च उंदी शानदार भूमिका दी सराहना कीती। सोशल मीडिया दी इक पोस्ट च दिते गेदे स्नेह च उनेँ हत्थखड्डी कारीगरें दी रचनात्मक समर्पण ते हुनर दी सराहना करदे होई आखेआ जे उंदे कम्म देसै दी जीवंत संस्कृति ते परम्पराएं गी दर्शादे न। उनेँ इस गल्लै पर बी जोर पाया जे हर कुसै गी भारत दी विरासत दे संरक्षण दे कन्नोकन्नी कारीगरें दी आर्थिक भलाई-बेहतरी दा समर्थन करना बी लोड़चदा ऐ।

<><><><><><>

Checkpoint Breach

जम्मू-श्रीनगर राश्ट्री जरनैली शिड़क पर रामबन जिले च अज्ज बड़डलै सवेला इक एस.यू.वी कार नै सुरक्षा नाके गी त्रोंड़ियै अग्गे नस्सने दी कोशश कीती जेहदे पर पुलसै ओदे पर गोलियां चलाइयां। डरैवर गड्डी गी उत्थे छोड़ियै मौके परा फरार होई गेआ। एह हादसा अज्ज बड़डले मूंह न्हरे तकरीबन साइडे 3 बजे उसलै होआ जिसलै चंदरकोट आले सुरक्षा नाके पर तैनात पुलसा देजवानें, श्रीनगर आली बक्खी दा आवा'रदी इक गड्डी गी रुकने दा इशारा कीता पर डरैवर नै गड्डी रोकने दे बजाय रफ्तार होर बधाई दिती। मगरा जिला पुलस, सी.आर.पी.एफ ते फौज आसेआ इक बड़डा तपाशी अभियान चलाया

गेआ। पुलसै थलास दे नेड़े संदिग्ध स्कार्पियो गड्डी गी जब्त करी लैता ऐ ते अगड़ी
तफ्तीश जारी ऐ।

<><><><><><>